

Supervizor Crishock: Vizija i snažno vodstvo imaju ključni značaj za napredak Brčkog



Povodom 25. godišnjice Brčko Distrikta, prvi zamjenik visokog predstavnika i supervizor za Brčko Distrikt Louis Crishock boravio je u dvodnevnoj posjeti Brčkom. Tokom posjete, supervizor se sastao sa domaćim i međunarodnim akterima kako bi razgovarali o trenutnoj političkoj i sigurnosnoj situaciji, statusu projekata koji su u toku i ključnim ekonomskim prioritetima koji su od najvećeg značaja za nastavak razvoja Brčkog. Supervizor Crishock je naglasio važnost snažnog vodstva za daljnje jačanje i unapređenje jedinstvenog socio-ekonomskog modela Brčkog.

Supervizor Crishock se sastao sa Ilijom Studenom, generalnim direktorom Studen&Co Holdinga, kako bi razgovarali o odnosu poslovne zajednice i lokalne uprave, kao i o opredjeljenosti poslovne zajednice da podstakne ekonomski rast u Brčkom.

Supervizor se sastao i sa rukovodećim zvaničnicima Brčkog, gradonačelnikom Sinišom Milićem, zamjenikom gradonačelnika Antom Domićem, predsjednikom Skupštine Damirom Bulčevićem i potpredsjednikom Ivom Filipovićem. U fokusu razgovora bila je važnost ulaganja maksimalnih napora u zaštitu stabilnosti Distrikta u uvjetima aktuelnih političkih izazova i potreba da se organi vlasti nastave fokusirati na realizaciju svojih obaveza u cilju unapređenja životnog standarda stanovnika Brčko Distrikta. Supervizor je također iskoristio priliku da

razgovara o perspektivama razvoja i prioritetima organa vlasti i sa predsjednikom SBB-a u Brčkom, Inom Pamukčić.

Tokom posjete, supervizor se također sastao sa komandantom EUFOR-ovog LOT-a, majorom Huberom, koji preuzima dužnost u Brčkom, pri čemu je istakao važnu ulogu koju EUFOR ima u održavanju sigurnog okruženja.

Tokom boravka u Brčkom, supervizor Crishock je prisustvovao Konferenciji o transportnoj infrastrukturi tokom koje je naglašeno da Brčko nije samo tranzitno čvorište već i ključna komercijalna tačka koja povezuje Bosnu i Hercegovinu s tržištima EU i regiona. Uz odgovarajuću politiku i ulaganja, Brčko ima potencijal da bude model rasta i napretka.

Supervizor se obratio na svečanoj akademiji organiziranoj povodom obilježavanja Dana Distrikta. Svaka godišnjica Distrikta je značajan pokazatelj uspjeha Brčkog, posebno u pogledu jačanja multietničke saradnje, promoviranja inkluzivnog i transparentnog upravljanja, te osiguravanja održivog rasta.

Za kraj posjete, supervizor Crishock se sastao sa glavnim imamom Mustafom efendijom Gobeljićem, dekanom brčanskog Dekanata Damirom Ivanovićem i protojerej-stavroforom Miodragom Tošićem, te uputio najljepše želje za miran i blagoslovljen post za sve zajednice. Zajednički su pozdravili činjenicu da različite vjerske zajednice u Brčko Distriktu žive skladno u poštovanju i razumijevanju.

Od efendije Gobeljića je supervizor dobio informacije o planovima i aktivnostima na obnovi Hadži-pašine džamije koja je nedavno uništena u požaru.

Međunarodna zajednica je partner koji je i dalje opredijeljen da pruža podršku Brčko Distriktu na njegovom putu da postane uspješna, razvijena, samoodrživa zajednica, u kojoj nema korupcije i gdje su ulaganja dobrodošla.







